

KA JINGIAIM LANG BA THYMMAI JONG NGI

Da

U Rev. O. F. Artopocus.

La pynwan sha ka Ktien Khasi da

I Mrs. W. Shullai, B. A.

La Pynmih da
Ka Khasi Jaintia Presbyterian Synod,
K. J. P. Church House,
Mawkhar, Shillong.

REFERENCE

Not to be Lent out


KA JINGIAIM LANG BA THYMMAI JONG NGI

Da

U Rev. O. F. Artopoulos.

La pynwan sha ka Ktien Khasi da

I Mrs. W. Shullai, B. A.



Library books will give you Joy for Long
If handled with care with clean hands
and handled carefully with clean hands
and if you do not care for them

KA JINGIAIM LANG BA THYMMAI JONG NGI

Ki jingpyrkhat bad jingmane Blei la thoh ha une u bnai khnang na ka bynta jong phi. Phin sa iarung lang ha ka jingim kaba suk eh bad kaba shitom ruh ka lynti, kata ka long, ka jingshongkurim. Ka lynti ka lah ban kut ha ka sngewsih bad bukhoh, ne, kaba dap naduh ba sdang haduh ba kut da ki por kiba bha. Ka shong ha phi keiñ kumno phin pynlong ia ka. Ka long te, namarkata, kaba donkam ba phin kylli ia lade, "Kumno ngi la pynkhreh bha ia lade ha ka jinglong mynsiem na ka bynta kane ka jingleit kaba jrong ? Kiei ki jingiarap ba kynja mynsiem ngi la ioh ? "

Ym don u ban pyrkhat ia ka jingleit khlem da pynkhreh lupa na ka bynta kano kano ka jingshem jingeh. Pynban arngut ki samla bun-sien ki sdang ia ka jingshongkurim—ka jingleit kaba jrong eh—khlem da pynkhreh ei ei ruh. Kumta ka jingmih ka long ba kim lah khlem ia-kynduh bad ki jingsuhsat bad ki jingshitom kiba jia borabor. Ka jingiaim lang jong ki ha ka jaka ba kan long ka jingkmn, ka long pynban ka jingshitom jingmut kaba khraw.

Ba phin iakynduh bad ka lawei jong phi, phi dei ban don artylli kiei kiei, (1) Ka jingngeit

jong phi ha U Khrist bad iwei ha iwei pat, (2) Ka
 jingieit jong phi ia U Khrist bad iwei ia iwei.
 Kine kin biang na ka bynta kano kano ka jingeh.
 Hynrei dei ban iai pynthymmai ia ki. Man ka
 sngi phi dei ban phikir shaphang kine, lym kum-
 ta ka sngi kan poi ba phin shem ia lade ba phi
 duna ha kito kiei kiei kiba phi donkam eh bad
 phim lah ban ioh. Ia kine ki jingpyrkhat mane
 Blei (devotion) la buh lyngkot khnang ba kan
 kham jem ia phi ba phin lah ban pyndep ia ki ha
 kaba kut ka sngi. Kin long tang ka jingsdang.
 Ka jingim jingduwai jong phi kan iai long shi-
 lynter ka jingim.

Ka Jingiaim Lang Ba Thymmai Jong Ngi.

Ka Janmiet Ba Nyngkong.

Ka jingieit ka long tang ma ka ka nongrim halor kaba phi lah ban tei skhem ia la ka jingshongkurim. Tang ka sngewburom sngewieit kam biang ban jop ia ki jingeh. Ka jingieit bad tang ka jingieit, ka ban plie ia phi ka lynti sha ka jingiaim lang kaba suk.

“Te kumta ka iaisah ka jingngeit, ka jingkyrmen bad ka jingieit ; hynrei kaba kham kongsan na kine long ka jingieit”. Pynlong ia ka jingieit ka jingthew jong phi. 1 Kor. 13 : 13 ; 14 : 1,

KA JINGDUWAI.

Ko Kpa jong ngi, ngi ainguh ia Me na ka bynta kane ka sngi kaba kham kyrpang. Haba kan sa wai ngi pyrkhat biang ia kaei kaba ngi la sdang. Haba ngi la pdiang lut iwei ia iwei ha ka jingieit, ngi la pdiang ia ka jingkitkhlieh baroh jong ka jingshongkurim. Ngi duwai ia ka jinglong ryngkat kaba iaineh jong Me bad ngi, ba kan mih kaba bha tam na ngi baroh arngut. To ai ba haba ki jingtrei jingktah baroh jong ka sngi

ki la sangeh, ka jingieit kaba khuid kan bat ia
ngi. Ha ka kyrteng U Khrist. Amen.

Ka Jingpyrkhat Ban Sah Kynmaw.

Ym don kaba kham thiang ban ia ka jingieit,
ym don kaba kham shlur, ym don kaba kham ha
jrong, ym don kaba kham iar, ym don kaba
kham sngewtynnad, ym don kaba kham dap ne
kham bha ha bneng bad ha pyrtnei ; namar ia ka
jingieit la kha na U Blei''.

Thomas a Kempis.

Ka Jingiaim Lang Ba Thymmai Jong Ngï.

Ka Janmiet Kaba Ar.

Ka jingpyrkhat jong phi ia kane ka jingim ba thymmai jong phi ka long kaba donkam eh. Bun ki jingshongkurim ki pulom tang namar ba u tnga bad ka tnga ki tharai ba lah ban ioh jingsuk khlem da leh shitom. Ki tharai jem eh ia ka jingkitkhlieh kaba thymmai jong ki. Haba dei ba dei ki pyllait ia lade na ki. Hynrei ha kaba don ka jingpyrkhat kaba beit, ka jingshongkurim kam ju long kaba shah jop. Ha kaba don shisha ka jingkwah ia ka jingkhuid bad ka hok, ka jingkmén ka mih. Ka jingshongkurim kam long kaba jem. Ka dawa ia ka jingseibor lang jong phi baroh arngut. Bad phi dei ban sdang naduh basdang.

“Ngan leh stad ha ka lynti kaba janai.....
Ngan iaid ha la iing bad ka dohnud kaba janai.”
Ps. 101 : 2.

KA JINGDUWAI.

Ko Kpa jong ngi, ai ba ka jingpyrkhat kaba ngi don mynta shaphang ka jingshongkurim kan iaisah bad ngi. Ngín sa donkam ban kyrtiang dien pat sha kine ki sngi kiba nyngkong. Ngín sa donkam ban pynkynmaw ia lade ia ki jingthew

kiba shaneng kiba ngi la buh ha khmat na ka bynta ka jingiaim lang jong ngi. Ka jingim kan ym long kaba suk suda. Ki jingeh kin wan kiba lah ban pynmynsaw ne pynduh wat ia ka jingieit bad ka jingiasoh jong ngi. Ka jingiasngewthuh bad ka jingiaieit jong ngi, bad ka jingaiei jong Me kin pynjop ia ki jingeh baroh. To ai bor ia ngi ba ngin sdang ha ka lynti kaba dei. Ha ka kyrteng U Khrist ngi pan. Amen.

Ka Jingpyrkhat Ban Sah Kynmaw.

“Na ka jingsdang kaba bha ka wan ka jing-kut kaba bha”.

John Heywood.

Ka Jingiaim Lang Ba Thymmai jong Ngi.

Ka Janmiet Kaba Lai.

Kaei kaba phi dei ban sngew shaphang ka tnga jong phi ? Nyngkong eh, phi dei ban pyrkhat ia ka kum ka lok jong phi kaba phi ieit bad ñiewkor. Kam dei kaei kaei ka ban shu pyn-donkam tang na ka bynta ka jingsngewbha doh. Kaba ar, phi dei ban ñiew ia ka ka nongiarap jong phi. Kam dei ka shakri jong phi ka ban shu trei jingtrei. Pdiang ia ka kum ka nongia-
ioh bynta lang. Burom ia ka jingai jingmut jong ka. Khmih ha ka kum ka kmie jong ka iing. Te phin pynlong ka jingshongkurim kaba shisha.

“Ki shynrang, to ieit ia la ki tnga ; kumba U Khrist U la ieit ia ka balang, bad U la aiti noh ia lade na ka bynta jong ka.” Eph. 5 :25.

KA JINGDUWAI.

Ko Kpa jong ngi, kane ka jingiasoh jong ngi ka long ka jingshem kaba ngim pat tip mynshuwa, bad mynta ngim kwah shuh ban duh ia kane ka jingsuk. Ngi tip ba lada iwei in pyrsang ban leh donbor halor iwei pat, ka jingiadei jong ngi kan don ha ka jingeh. Ka jingsuk jong ngi kan phet noh. Kam lah long da kumwei pat.

Iarap ba ngi lah ban iakit lang ha ka khia ka shon bad ha ka jingsngewbha kumjuh, ba ka jingiasoh kaba khelaiñ bad ba itynnad kan nang san. Ngi duwai ia ka jingkyrkhu jong Me ha ka kyrteng U Khrist. Amen.

Ka Jingpyrkhat Ban Sah Kynmaw.

Haba phi tharai ba phi la ieit shisha, to kynmaw ia ka jingieit jong U Khrist ia phi.

Ka Jingiaim Lang Ba Thymmai Jong Ngì.

Ka Janmiet Kaba Saw.

Ka jingieit kylliang iwei ia iwei pat ka long ka jingiadei kaba marryngkat iwei bad iwei pat. Namarkata, knm ka kynthei, phi dei ban siew kylliang ia ka jingieit u tnga jong phi da ka jingieit. Da kaba sngewlem, phi dei ban kit ia ka jingshitom jong u kum la ka jong. Ka jing-kmen jong u ka dei ban long ka jingkmen jong phi. Da kaba shlur, phi dei ban ialong lang bad u ha kaba pynlong ki jingiakut. Ia kane phi dei ban leh borabor kum ka nongiaioh bynta lang kaba paka. Lada phi tieng ban kren ia kaba phi sngew, phim leh hok satia ia lade lane ia u. Ka jinglakloi jong phi ban long nongiaioh bynta lang kan nang plie lad shibun ia ka jingjop.

“To da sharai phi, to da ieng skhem phi ha ka jingngeit ; To da leh shlur, to da pynkhlañ ia lade phi. To ai ba baroh kaba phi leh, phin leh ha ka jingiaieit.” I Kor. 16 : 13, 14.

KA JINGDUWAI.

Ko Kpa jong ngi, ka jingjop jong ka jing-shongkurim jong ngi ka shong tylli ha ngi ym hano hano. Lada ngi kwah, ngi lah ban pynbeit

ia ki kamram jong ngi kumta ba ngin iaiaid hi
 la ka jong ka lynti. Lane ngi lah ban pynlong
 ka jingiadei lok ha ki kamram jong ngi baroh,
 ha kaba ngin iatrei lang, iashim bynta lang
 bad iapyndep lang ia ka kam baroh. Iarap ia
 ngi ban iaieit iwei ia iwei pat, kata hi kan iarap
 ia ngi ban iateh lok. Bad halor baroh, iarap ia
 ngi ban siew ia ka jingieit jong Me da ka jingieit
 ia kiei kiei baroh kiba sngur bad kiba khuid.
 Ngi pan ha ka kyrteng U Khrist. Amen.

Ka Jingpyrkhat Ban Sah Kynmaw.

“Ka jingioh kynti kaba bha tam jong u
 briew ka long ka tnga kaba sngewlem.”

Euripides.

Ka Jingiaim Lang Ba Thymmai Jong Ngi.

Ka Janmiet Kaba San.

Mynshuwa phi la don tang la ki jong ki jing-jied bad ki jingkwah ban pyrkhat, Mynta don sa ka jong iwei pat lem bad la ka jong. Ka jingmih te ka long ba phi baroh arngut phim ioh shuh tang la ka jong ka mon borabor. Ka jingiateh lok ba thymmai jong phi kan ym shah ia kata. Ka dawa ba phin tip lut ia ki jingkwah bad jingbymkwah jong iwei bad iwei pat bad ban pyniadei ia lade ha ki. U shabi ka jingsuk jong phi u shong ha kaba pyrkhat nyngkong ia la i lok. Hynrei baroh arngut hi phi dei ban ialeh kumta.

“Khlem da khmih uwei uwei baroh tang ia la ki jong hi, hynrei ia ki jong kiwei pat keiñ.”
Phil. 2 : 4.

KA JINGDUWAI.

Ko Kpa jong ngi, kan long kaba eh ia ngi teng teng ban kynmawba ngim lah ban leh katba ngi sngewbha borabor. Ha ka jingkyrkieh jong ngi ngin bakla. Ngin klet iwei ia iwei. Pynban lada naduh basdang hi ngi, da ka jingaiei jong Me, ngi tei ia ka jingiadei lok kaba shisha, ka jingiaim lang ba thymmai jong ngi kan ym

poi sha ka jingshitom. Ngin long kiba kloi ban pynbeit ia ki jingbakla jong ngi. Ngin ym iaklet iwei ia iwei. To pynskhem ia ka jingiaieit jong ngi haduh ka bakut. Ngi pan ha ka kyrteng ba khuid jong U Khrist. Amen.

Ka Jingpyrkhat Ban Sah Kynmaw.

Ka jingshongkurim kam dei ka kam kaba dei tang ia kawei ka liang. Baroh arngut ki dei ban ai ; baroh arngut ki dei ban shim.

Ka Jingiaim Lang Ba Thymmai Jong Ngï.

Ka Janmiet Kaba Hynriew.

Wat shah pynbieit ha kaba ngeit ba ka jingshongkurim jong phi ka lah ban long kaba suk ba saifñ khlem da ai lut ia lade ha ka. Baroh kaba phi long bad baroh kaba phi don phi kitram iwei ha iwei. Kane ka long ka jingmut jong ka jingshongkurim Kane ka long kata kaba phi la iakular ban ai. Lada phi ai tang shiteng shiliang, phim leh hok kumba phi dei ban leh ia la i lok. Ym tang ban iasoh ha ka met hynrei bad jingmut bad mynsiem kumjuh. Phi dei ban ialong kawei.

“Namar kane u briew un iehnoh ia la u kpa bad ia la ka kmie bad un iaineh bad la ka tnga : Te ki baroh arngut kin ialong kawei ka doh.” Eph. 5 : 31.

KA JINGDUWAI.

Ko Kpa jong ngi, ha kaba ngim ai lut ia lade, ngi lah ban duh ia ka jingsuk jong ka jingim ba thymmai jong ngi. Hooïd ka long ba ngim leh hok. Ngim long kiba shisha. Haba ngi iasmai, ngi iathuh ha kaba paw ia ka jingkwah jong ngi ban iasoh baroh phar khlem da tyngkai ei ei shuh. Namarkata lada don ei ei

ka ban pyniakhlad ia ngi to weng noh ia ka.
 To pynkynriah noh ia ka jingartatien bad ka
 jingbymshaniah baroh na ka dohnud jong ngi.
 Bad to nang pynroi ha ngi ia ka jingmon sngew-
 bha ban aiti lut ia lade met, jingmut bad
 mynsiem baroh sha kane ka jingiatur kaba
 thymmai jong ka jingshongkurim. Ha ka kyr-
 teng ba kordor jong U Khrist. Amen.

Ka Jingpyrkhat Ban Sah Kynmaw.

“Ka jingshongkurim ka long kaei kaei kaba
 phi dei ban ai la ka jingmut baroh.”

Herrick Ibsen.

Ka Jingiaim Lang Ba Thymmai Jong Ngì.

Ka Janmiet Kaba Hynniew.

Ka jingiakren jong ki lok bad ki paramarjan ka lah ban pynngeit ba don ei ei kaba sngew-lehraiñ shaphang ka jingshongkurim. Ngeit ba kam long kumta. Kane ka kam kaba dei ban long hi, kam long kaba lehraiñ lane ka bymkhuid. Ka jingiasoh ka kylla long ha phi kat kumba phi hi phi pyrkhat shaphang jong ka. Ka lah ban long kaba lehraiñ. Ka lah ban long ruh kaba donburom, ka shong ha phi keiñ. U Blei U mut ia phi ban sumar khuid ia ka. Namarkata phi dei ban leh ia kane da ki jingmut bad ki dohnud kiba khuid, ym tang ha ki khyndiat sngi kiba nyngkong hynrei borabor.

“Kiei kiei baroh ki long kiba khuid ha kita kiba khuid, hynrei ha kita ia kiba la pyntngit bad ki bymngeit, kaei kaei ruh em kam long khuid ; hynrei la pyntngit ia ka jingmut bad ia ka jingiatiplem jong ki.” Titos 1 : 15.

KA JINGDUWAI.

Ko Kpa jong ngi, ki jingthmu jong Me na ka bynta jong ngi ki long borabor kiba sngur bad kiba khuid. Tang ki jingbakla jong ngi ki pynlong ia ki kiba sngewlehraiñ. Kumta ka long

bad ka jingiasoh jong ngi. Lada ngi ri ia ki jingpyrkhat jong ngi shaphang jong ka, sngur bad khuid, kan long keiñ kaba sngur bad kaba khuid. To ai ha ngi ka jingstad ban pyndonkam ia ka jingshongkurim jong ngi ha ka rukom kaba dei ba kan iai long ka jingkyrkhu shilynter. Ngi pan ia ka ha ka kyrteng jong Uta Uba long Uba khuid bad Uba janai. Amen.

Ka Jingpyrkhat Ban Sah Kynmaw.

“Lada kaba shapoh jong phi ka long kaba bha bad kaba sngur, phin lah keiñ ban iohi bad sngewthuh bha ia kiei kiei baroh phar.”

Thomas a Kempis.

Ka Jingiaim Lang Ba Thymmai Jong Ngì.

Ka Janmict Kaba Phra.

Kumba ki babun kiba dang lah shongkurim ki shem, phi ruh phin lap ba ka jingiasoh arngut kam long ha kaba nyngkong kumba phi mut ba kan long. Lah ban don ka jingtieng, ka jingsngewlehrañ, wat ka jingartatien, kiba dei ban jop shuwa ba ka jingiasoh kan long kaba shisha. Ka jingiadei jong phi baroh arngut ka dawa ia ka jingiaishah baroh bad ka jingsngewthuh baroh ba phi baroh arngut phi don. Dei hangne koiñ ba ka jinglong khristan jong phi kan iakynduh bad kawei na ki jingtynjuh ba khraw tam. Tang ka jingsbun bad ka jingiaburom iwei ia iwei pat kaba wallam ka jingkmèn kaba dap biang ha kane ka jingiasoh.

“Ba phin long ba la pynkhlañ da ka bor baroh, katba kum kata ka bor ka burom jong U, sha ka jingiaishah bad ka jingshahslem baroh lem bad ka jingkmèn.” Kol. 1 : 11.

KA JINGDUWAI.

Ko Kpa jong ngì, ha ka jingiasoh ba kynja doh jong ngì, ngì kham dem eh ban leh pop iwei ia iwei. Lymda ngì iapyrkhat markylliang ia ki

jingsngew jong iwei pat borabor bad da leh don-
 akor paralok, ngi lah da kaba jem ban pynduh
 noh ia ka jingkmen jong ngi. Ngi donkam ka
 jingiaishah. Ngi donkam ka jingsbun kaba shi-
 sha. Ngi donkam ka bor ban synshar ia lade.
 Tang ma Me Uba lah ban pynbiang ia kaba
 donkam baroh. Ngi duwai ia ka jingiarap jong
 Me mynta, bad khamtam eh, ia ka jingdon ryng-
 kat ba iaineh jong Me wat ha ka jingiadei ba jan
 eh jong ngi arngut. Ha ka kyrteng U Khrist.
 Amen.

Ka Jingpyrkhat Ban Sah Kynmaw.

Ka jingiasoh ki dohnud ka long ka nongrim
 jong ka jingiasoh ba kynja doh kaba shisha.

Ka Jingiaim Lang Ba Thymmai Jong Ngï.

Ka Janmiet Kaba Khyndai.

Phi lah ban ym pynpaw ba phi tieng iwei ia iwei pat. Hapoh jong phi, la kumno kumno, lah ban don ka jingtieng. Lehse ka jingtieng ia kaei ba iwei pat i lah ban pyrkhat. Ka lah ban long ka jingsheptieng ia ka jingduh ei. Kane ka long ka jait jingtieng kaba kham sniew shibun. Namar na ka bynta kata phim ioh ka jingiasoh kaba biang ha ka jingiadei jong phi arngut. Phim iaioh bynta lang ha ki jingkmen ba kynja mynsiem bad ka jingiasyllok jong ka jingim ba thymmai jong phi. Phi dei keiñ ban wad kloi ia ka jingiasngew shaniah hapdeng jong phi ba kano kano ka kynja jingsheptieng kan ym shong ha ki dohnud ki jong phi.

“Ym don ka jingsheptieng ha ka jingieit : hynrei ka jingieit ba janai ka shop noh shabar keiñ ia ka jingsheptieng.” I Ioan. 4 : 18.

KA JINGDUWAI.

Ko Kpa jong ngi, lada hapoh ki dohnud jong ngi ngi la shah ia ka jingsheptieng ha ka jaka ka jingngeit ba kan nang san, to map ia ngi. Khlem ka jingngeit bad jingshaniah iwei ha iwei pat, ngi thaw kloi lan ia la ka lynti sha

ka jingduh ei. Khlem ka jingiashaniah, ngi nang long kiba kham sheptieng. To pyndap ia ngi da ka jingshlur ba ngin tur hok ia kino kino ki jingeh kiba lah ban wan. Bad iarap ia ngi ban pyndem lang ia lade baroh phar ha ki jingshem jong ngi baroh. Tang da kaba iapynpaw ia ki jingpyrkhat bad ki jingsngew ba shapoh tam jong ngi ba ngi lah ban beh noh ia ka jingsheptieng. Kyrkhu ia ngi haba ngi pyrshang ban leh kumta. Ha ka kyrtong U Khrist. Amen.

Ka Jingpyrkhat Ban Sah Kynmaw.

“Ka jingshlur ka kham bha ban ia ka jingsheptieng.”

Washington Gladden.

Ka Jingiaim Lang Ba Thymmai Jong Ngï.

Ka Janmiet Kaba Shiphew.

Ka lah ban jia ba iwei im kwah ia kaba iwei pat i kwah. Ym borabor ba baroh arngut kin iakwah lang ia kajuh. Hynrei ym dei ba iwei in pynbor ia iwei pat pyrshah ia ki jingkwah jong i. Lada kumta, ka jingiasoh shongkurim ka kylla long ka jingkwah brai ka doh ym ka jingleh jong ka jingieit. Haba ym don ka jing-iakut lang, phi baroh arngut phin kham ioh myntoi da kaba synshar ia lade.

“To ka jingshongkurim kan long kaba don-burom.....” Heb. 13 : 4.

KA JINGDUWAI.

Ko Kpa jong ngi, to ai ba ka jingieit jong ngi kan ngam jylliew, ba ngin iaieit hok iwei ia iwei pat. larap ba ngin jop ia ki jingkwah ba kynja doh kiba lah ban pynduh noh ia ka jingia-im suk jong ngi. To ai ia ngi ka jingstad ba ngin ym ai lad ia kaei kaei ka ban pynsniew ia ka jingshongkurim jong ngi. Ha ka kyrteng U Jisu ngi pan. Amen.

Ka Jingpyrkhat Ban Sah Kynmaw.

Phim lah da lei lei ban pynbor iano iano ban leh ia ka kam jong ka jingieit. Ka jingieit hi ka pynleh.

Ka Jingiaim Lang Ba Thymmai Jong Ngi.

Ka Janmiet Kaba Khadwei.

Ka jingiasoh ba kynja doh ka long ka bynta kaba donkam ia ka jingshongkurim jong phi. Hynrei kam da long ka bynta kaba donkam tam. Shisha phim dei ban shah ia ka ban synshar ia ki jingim jong phi. Ka kham dei pynban ia phi ban wad kumno ban iatei ia ka jingiasyllok da kiwei pat ki lad, kum kaba iamane lang, iatrei jingtrei lang, ialehkai lang, iapule lang, iarwai lang. Na kane ka rukom jingiasyllok kan mih ka jingiajan jong ka mynsiem ka ban ai ka dor ka ban sah shilynter ka jingim lang jong phi.

“Kiei kiei kiba bha, kiei kiei kiba donburom, kiei kiei kiba hok, kiei kiei kiba khuid, kiei kiei kiba itynnad, kiei kiei kiba dei iaroh ; lada don kano kano ka jingbha bad lada don kano kano ka jingiaroh, to phin iapyrkhat ia kine kiei kiei ruh”. Phil. 4 : 8.

KA JINGDUWAI.

Ko Kpa jong ngi, wat ai ba ngin shu sngew-hun ba ka jingshongkurim jong ngi kan kut tang ha ka jingiasoh ba kynja doh, hynrei pyndap ia ngi da ka jingkwah ban wad ban shem ia ki lad kiba bha baroh kiba don ha khmat jong ngi, ba

ngin sngewbha ha ki bad ban nang ban pyn-
trei kam ia ki. To kyrkhu ia ngi mynta katba
ngi sdang ban wad ia ka jingiasyllok kaba khuid
bad kaba khlaiñ ka ban neh haduh ka bakut.
Ngi duwai ba U Khris Un ym long shabar na ka
jingiasyllok jong ngi. Sngew ia ki jingduwai
jong ngi ha ka kyrteng jong U. Amen.

Ka Jingpyrkhat Ban Sah Kynmaw.

Ki arngut kiba suk tam ki long kito kiba
tip kumno ban myntoi na ki jingshem baroh
jong ka jingshongkurim bad kiba leh ruh
kumta.

Ka Jingiaim Lang Ba Thymmai Jong Ngi.

Ka Janmiet Kaba Khadar.

Khlem artatien ei ei, phin kwah ban ioh ki khun ki kti. Ka long kaba bha shisha. La kumno kumno, ka jingshongkurim jong phi kan myntoi lada phin ym da kyrkieh eh khnang ba phin da iaithuh ithaw janai. Hadien phi lah ban sdang ban thaw dur ia ka iing ka sem. Phin ym pynsyrwa ia ka por. Hynrei phin tei bad nang tei bha da kaba pyrkhat. Ki khun ki long kiba suk tam ha ki iing ha kiba ki kmie ki kpa ki long kiba iadei jingmut.

“Ban leh khlem da pyrkhat bha kam long kaba bit, bad ban kyrkieh than eh ka pynpoi sha ka bym dei”. Pro. 19 : 2.

KA JINGDUWAI

Ko Kpa jong ngi, wat ai ba ka long-iing long-sem jong ngi kan shitom namar ba ngi la kyrkieh bad leh bymsuidñiew ha kaba pynkhreh ia ka. Ngi kwah ban long ki kmie ki kpa kiba bha. Hynrei nyngkong eh ngi kwah ban da iatip bad iaieit bha iwei bad iwei pat. Ngi kwah ban ym don ei ei kaba buhrieh kaba lah ban pyniakhlad noh ia ngi. Kyrkhu ia ngi ha kine ki sngi ba ngi

lah shisha ban pynkhreh ia lade ha ka rukom
 kaba dei na ka bynta ka jingkyrkhu ba phylla ha
 kaba ioh ki khun. Ha ka kyrteng bakhuid jong
 U Jisu. Amen.

Ka Jingpyrkhat Ban Sah Kynmaw.

Ki arngut kiba iatip bad iasngewthuh bha
 iwei ia iwei pat ki pynlong ki kmie ki kpa kiba
 bha tam.

Ka Jingiaim Lang Ba Thymmai Jong Ngì.

Ka Janmiet Kaba Khadlai.

Kaei ka jingthmu jong ka jingshongkurim jong phi ? Tang ban pynlong iing ? Ka jingthmu ka dei ban long ban tei ia ka iing Khristan. Ka don ka jingiapher ha kine ar. Ha ka iing Khristan uwei-pa-uwei u dkhót u sakhi ia ka jingshisha ba u long u jong U Khrist. Baroh shijingim phiu ym ioh kawei pat ka lad kaba kham bha ban sakhi ia ka bor bad ka jingaiei jong U Khrist ban ia kata kaba ka iing ka ai. Ka jingieit, ka jingiadei lang, ka jingiasngewthuh ha ka jingtrei jingkam ka pynpaw ia ka jingdon ryngkat U Khrist kham bha ban ia ki ktien jong phi baroh.

“Kaei kaei baroh kaba phi leh ha ka ktien lane ha ka jingleh, to leh ia baroh ha ka kyrteng U Jisu Uba U Trai da kaba ainguh ha U Blei Uba U Kpa da U.” Kol. 3 : 17.

KA JINGDUWAI.

Ko Kpa jong ngi, ngi pynkyntang ia lade ha kaba tei ia ka iing Khristan. Ia kane ngi dei ban leh lada ngin pyndep ia ka jingthmu ba shisha jong ka jingshongkurim jong ngi. Khlem ka jingiarap jong Me ngin ym lah.

Khlem ka jing-la-kloi ban iatrei lang kum kawei,
 ngin ym lah ban poi sha kaba ngi thmu. Ngin
 iatrei lang suk mynsiem bad ngin iatei lang ia
 ka burom jong Me. Iarap ba ka jingphla jong
 ngi ia ka jingieit bad ka bor jong Me kan long
 kaba khlem sngewlehraiñ. Ha ka kyrteng U
 Jisu ngi pan. Amen.

Ka Jingpyrkhat Ban Sah Kynmaw.

Ka ĩing Khristan kaba shisha ka long kata
 kaba U Khrist U long U Pdeng jong ka.

Ka Jingiaim Lang Ba Thymmai Jong Ngì.

Ka Janmiet Kaba Khadsaw.

Ka jingpyrkhat ia ka jingshakri ka dei ban long kaba ha khlieh tam ha ka jingmut jong phi ha kine ki sngi. Phi la jied ia la u bynta ia uba phin shakri hok shilynter ka jingim. U tnga u shakri ia la ka tnga. Ka tnga ka shakri ia la u tnga. Kam dei ban long da kumwei pat. Ka nuksa ka jingshakri jong U Khrist ka long hi ka nuksa kaba bha tam ba phin bud. Ka jingshakri jong U ka bym don ka jingsarong. Ka long ka jingshakri ka bym leh tang namar ka long ka kamram hynrei ka jingshakri kaba mih na ka jingieit.

“Namar la khot ia phi sha ka jinglaitluid ko parabangeit : tang ba phin ym pyntrei ia kata ka jinglaitluid jong phi ia ka ban ai daw ia ka doh hynrei da ka jingiaieit phin iashakri paralok.” Kol. 5 : 13.

KA JINGDUWAI.

Ko Kpa jong ngi, ha kaba ym don ka jinglaitluid, ka jingshakri ka kylla jinglong mraw. Ym don ba lah ban pynbor ia ngi ban shakri. Ka jingkwah ka dei ban mih na la ki dohnnd hi, To pynkynmaw ia ngi borabor ba ngi long ki

nongiatrei lem. Namarkata, iwei iwei na ngi im dei ban khmihlynti ba marwei in kit lut ia ka jingkit, lymne ngin khmihlynti ia i lok jong ngi ba in leh ia kaei kaba ma ngi hi ngim mon ban leh. Lada ngi leh kumta to pynbeit ia ngi. Iarap ia ngi ban buh ia ka nuksa ka jingshakri U Kynrad jong ngi ha khmat jong ngi. Ngi pan ia kane ha ka kyrteng jong U. Amen.

Ka Jingpyrkhat Ban Sah Kynmaw.

Ka jingshakri kaba kum ka jong U Khrist kam ju long ka jingkit iano iano, tang ka jing-kmen.

Ka Jingiaim Lang Ba Thymmai Jong Ngi.

Ka Janmiet Kaba Khadsan.

Ka jingkohnguh ka long kawei na ki jing-itynnad jong ka jingshongkurim. Ka long ruh kawei na ki jingdonkam eh jong phi. Ban long kiba suk shisha phi dei ban tip ba i lok jong phi i ieng skhem ha ka liang jong phi borabor. Hynrei wat bakla ia ka jingkohnguh ba ka long kaba shu iamynjur ia kaei kaei kat kaba i lok jong phi i leh ne i ong. Phim dei ban khaprip la ki khmat ia ki jingduna bad jinglait jong iwei pat. Phin kham dei pynban ban pynbeit ia ki jingbakla, bad artad phin iaineh iba shaniah iwei ia iwei pat haduh kaba kut.

“Ngan ym iehnoh ia me lymne ngan ym kyntait ia me”. Joshua 1 : 5.

“Ka jingieit kan ym duh noh lano lano ruh.” I Kor. 13 : 5.

KA JINGDUWAI.

Ko Kpa jong ngi, haba kiwei kim shaniah shuh ia ngi, ai ia ngi ka jingaiei ba ngin long kiba shisha. Bunsien kane hi ka jingiashaniah iwei ia iwei pat hapdeng jong ngi ka ban ai ia ngi ka jingshlur ban nang iaid shaphrang ban

peit ia ka lawei. Na kawei ka por sha kawei ka
 por ngin iakdew ia ki jingbakla iwei ia iwei pat.
 Ngin ym sngewhun borabor bad kaei ba ngi leh.
 Hynrei tang lyngba ka jingialam jong Me ba ngi
 lah ban iapynbeit ia kine ki jingbakla ha ka
 mynsiem ka jingieit. Halor kine baroh ai ba yn
 ym shem ia ngi kiba ym don ka jingshisha. Ha
 ka kyrteng jong U Khun jong Me ngi duwai.
 Amen.

Ka Jingpyrkhat Ban Sah Kynmaw.

Kawei na ki jingkyrkhu jong ka jingshong-
 kurim jong phi ka long ka jingsngewskhem ba
 phim long marwei.

Ka Jingiaim Lang Ba Thymmai Jong Ngì.

Ka Janmiet Kaba Khadhynriew.

Ka jingshongkurim ka long ka jingtynjuh ia ka dohnud. Ym dei tang shisien hynrei bun bunwat ka donkam ka jingiapan map iwei na iwei pat bad ban iamp. Bun na ki suhsat jong phi yn law tang lada phin iamp. Hynrei phi dei ruh ban kloi ban iaklet. Kam mih jingbha ei ei na kaba shu dem pyrkhat sngewsih ia kaba la dep ka jingbakla. Shisien ba la ai ki jingmap, ai ba yn klet noh ia ka jingbakla. Sdang thymmai. Kane kaba klet ka long ka bynta kaba shai jong ka jingmap. Khlem kane ka jingmap kam don jingmut ei ei.

“To phin long kiba leh sbun paralok, kiba jemnud, kiba iamp paralok, kumba U Blei ruh ha U Khrist U la map ia phi.” Ephesos 4 : 32.

KA JINGDUWAI.

Ko Kpa jong ngi, bunsien ngi long kiba sarong than ban iapan map iwei na iwei pat. Ngì pyrkhat bieit kumba ka long ka dak jong ka jingtlot, ban pan map. To ai ha ngi ka jingstad ba ngin shem ba kam long kumta. Ngì pyni ia ka bor bad ka jinglongkhlaifn haba ngi pan map

bad haba ngi map. Ngi pyni ia ka jingieit kaba shisha haba ngi lah ban iaklet. Ai ba U Mynsiem ka jingmap jong Me Un ialam ia ngi borabor. Ha ka kyrteng jong Me ngi kyrpad. Amen.

Ka Jingpyrkhat Ban Sah Kynmaw.

To map te yn map ia phi ; to ai te yn sa ai ha phi ruh. Naba da kajuh ka jingthew da kaba phi thew, yn thew pat ia phi. Loukas 6 : 37-38.

Ka Jingiaim Lang Ba Thymmai Jong Ngï

Ka Janmiet Kaba Khadhynñiew.

Kawei na ki jingsngewbha ba shisha ka jingshongkurim ka long ka jingiasngew bad iamut ia kajuh. Phin don ki jingmut kiba phin ia-pyrkhat bad ban iakren, ki jingiaai jingmut ba phin iaai. Bad katba phi nang iajan bad ia-ithuh bha phin don ruh kiei kiei kiba rieh ban ia-kut lang. Ki long ki jong phi kiba phim dei ban iathuh ha kiwei pat. Kan don ka jingsuk ia phi lada phi burom ia ka jingiadei jong ka jingim ba thymmai jong phi. Da kumwei pat, u thyl-lieid u bym lah set ia kaba rieh u die kylla ia ka jingshaniah jong phi bad u pynlong tat ia ka jingshongkurim.

“Me la tynjuh līt ia nga, te mem shem ei ei ; nga la thmu khnang, ba ka.shyntur jong nga kan ym palat”. Salm. 17 : 3.


KA JINGDUWAI.

Ko Kpa jong ngi, ngi ainguh ia Me na ka bynta ka por ba jarjar ba ngi pynbeit lang. Ngï ainguh ia Me na ka bynta ka jingkmén ban tip ba ngi lah da kaba iashaniah lut ban iaphylliew ia ki jingmut ba rieh tam jong ngi. Ai namar-kata, ngi kyrpad, ba ngin lah ban ri khop ia

kaei kaba la shaniah ha ngi, ba ngin ym iasbet-
kylla. To set khop ia ki rmiang shyntur jong
ngi lada ki kwah ban kren haba ki dei ban sngap
jar. Ngi pan ia kane ha ka kyrteng jong Uta
Uba la ri khop ia kiba rieh ki jong Me. Amen.

Ka Jingpyrkhat Ban Sah Kynmaw.

“Jar uba sumar ia la ka shyntur bad ia la
u thyllieid u sumar ia lade na ka jingjynjar.
Pro. 21 : 23.



Ka Jingiaim Lnag Ba Thymmai Jong Ngì.

Ka Janmiet Kaba Khadphra.

Ka jingphikir ha kiei kiei kiba rit ka long kaba donkam eh. Kawei ka ktien jong ka jingpynshlur hateng hateng ka lah shibun ban pynkhlañ ia ka jingteh hapteng jong phi. Ka jingsbun bad ka jingpyrkhat, la ka dei ban da leh shitom khyndiat, ki tei ia ka jingsngewthuh jingmut iwei ia iwei pat bad ia ka jingiashaniah. Ki jingai sngewbha kiba rit ba la ai khlem da khmih lynti ki lah ban donkam khyndiat ka jingpynlut na i jingkyshew jong phi, hynrei ki ai ka jingsngewbha ha ka im-lang sah-lang jong phi. Ka jingiaineh jong phi ha kine kiei kiei kiba rit kan pynioh ia phi ka bainong ka jingiashong suk shirta.

“Da pyni ia lade ka rukom ha ki jingleh ba bha”. Titos. 2 : 7.

KA JINGDUWAI.

Ko Kpa jong ngi, ka long tang kaba rit eh ka jingseibor ban long kiba sbun. Ban ai kawei ka ktien jong ka jingpynshlur ka long kaba jem kum kaba ai ka jingkhñium. Pynban katno sien ngim lah satia ban long kiba sbun. Ngì dontang ki ktien eh ban ong. Ngì klet ba ka jingshong-

kurim kaba suk shisha ka long ka jingmih jong
 ka jingiaineh ha kaba sumar bniah ia kiei kiei
 kiba rit. To pynlong ia ngi kiba iohi bad kiba
 tip ia kiba bun ki lad ba ngi don kawei-pa-kawei
 ka sngi na ka bynta ban nang pynbha ia ka jing-
 shongkurim jong ngi. Pynkhlaifn ia ngi ha ka
 jingkwah jong ngi ban pyndonkam ia ki. Ngi
 duwai ha ka kyrteng U Khun jong Me. Amen.

Ka Jingpyrkhat Ban Sah Kynmaw.

Phi jop bha ia ki jingtynjuh kiba khraw
 jong ka jingim ba la shongkurim jong phi da
 kaba jop ia kiba rit nyngkong.

Ka Jingiaim Lang Ba Thymmai Jong Ngï

Ka Janmïet Kaba Khadkhyndai.

Khlem ka jingmynjur jong phi ym don mano
 mano lane kaei kaei kaba lah ban pyniakhlad ia
 phi. Ha kane ka jingiadei, ma phi hi kiba pyn-
 skhem ia ka jingiashonglang sahlang jong phi.
 Ia kane ka jingai U Blei hi U la ai ha phi. U
 mon ba phin iaimglang-sahlang haduh kaba
 kut. Bad phi lah, shisien ba phi la kut jingmut
 ban leh kumta. Tang teng teng phin shah ia
 lade kiba iakhlad, bad kata ruh tang khyndiat
 por katba lah.

“Wat kyrpad ia nga ba ngan khlad noh na
 phi, ia ka ban phai noh na kaba bud ia phi: naba
 sha kaba phin leit ma phi, hangta nga ruh ngan
 leit, bad ha kaba phin shongbasa ma phi, hangta
 nga ruh ngan shongbasa : ki briew jong phi kin
 long ki briew jong nga, bad U Blei jong phi Un
 long U Blei jong nga ; ha kaba phin iap ma phi,
 hangta hi ruh yn tep ia nga : to U Trai Un leh
 kumta ia nga, bad tam ruh, lada ei ei sa tang ka
 jingiap ka ban pynkhlad ia nga na phi”. Ruth.
 1 : 16-17.

KA JINGDUWAI.

Ko Kpa jong ngi, ka long ka jingpynshoi
 kaba khraw ban phet noh haba wan ki jing-

shitom. Hynrei ka kamram ka dawa ba ngi ia-sah lang bad ban tur ia ki jingeh da kaba shlur bad kaba beit. To pynkhlañ ia ngi ha ka jingkut jingmut jong ngi ban iaineh. Ai ba U Mynsiem jong U Khrist, Uba la hikai ia ngi kumno ban ieit, Un paw ha man la ka jingpyrkhat bad ka jingleh jong ngi. Ha ka kyrteng jong U ngi pan. Amen.

Ka Jingpyrkhat Ban Sah Kynmaw.

“Ka jingieit ka jop ia baroh”.

Vigil.

Ka Jingiaim Lang Ba Thymmai Jong Ngi.

Ka Janmiet Kaba Arphew.

Kawei kaei kaei ban tip ha kaba sdang ka long ba ka jingshongkurim kan long kaba roi bad bha hi da ka hi. Phi hi phi dei ban trei ban pynlong ia ka kumta. Tang ka jingseibor ka ban khang ia ka jingpulom jong ka. Bad lada kumno kumno ka jingshongkurim jong phi kan jot, kan long kaba eh than ban tei pat ia ka. Ha ka jingshisha, ka long bunsien ka byn lah ban moramot ia ka jingsniew kaba la long. Na ka bynta kane ka daw hi kaba donkam eh ia phi ban sumar. Naduh kaba dang sdang phi dei ban trei da kaba sumar bad bniah na ka bynta ka jingbha jingroi jong ka jingim ba thymmai jong phi.

“Ia ngin iabehbrai ia kita kiei kiei ruh ki jong kata ka jingiasuk, bad ia kita kiei kiei ruh da kaba ngin iatei paralok hi”. Rom. 14 : 19.

KA JINGDUWAI.

Ko Kpa jong ngi, to pyllait ia ngi na ka jingpyrkhat bymdei ba ka jingshongkurim jong ngi kan poi bha wat lada ngim da seibor ei ei ma ngi ban pynlong kumta. Ngi tip ba ngi dei ban ai ia la ka jingmut bad dohnud baroh ha ka.

Ka jingiadei kaba mynta jong ngi iwei bad iwei pat ka dei ban iaineh katba ngi dang im. Ai ba ngin ym pha ia ka jingsuk jong ngi da kaba long khlem pyrkhat iwei ia iwei pat. Kham tam, ai ba ngin ym long kiba bieit katta katta ban klet ia Me. To iada ia ka iing jong ngi mynta ka miet na kaba sniew baroh. Ha ka kyrteng ba khuid jong Me ngi pan. Amen.

Ka Jingpyrkhat Ban Sah Kynmaw.

Uwei u briew u lah ban pynjot pynpra noh ia ka jingshongkurim da ka jingleh sting, hynrei arngut ki dei ban trei khlem thait ban pynlong ia ka kaba long kam bad kaba bha.

Ka Jingiaim Lang Ba Thymmai Jong Ngì.

Ka Janmiet Kaba Arpewwei.

Lada phi kwah, phi lah da kaba jem ban pynduh ia ka jingsuk ka jingshongkurim jong phi. Don bun ki rukom ban leh kumta. Lehse ka lad kata jem tam ka long ban kynrang ia ka jingieit jong phi da kaba iai tharai sniew iwei ia iwei pat. To long kiba suki ban tharai sniew iwei ia iwei pat bad ban ym shaniah ia ka jingbha bad ka jingbeit jong iwei ; hynrei lada mih jing-tharai sniew kumno kumno, to iakren shai shaphang kata. Ka da kham bha keiñ ban iatai nia shaphang kata da kaba shai ban ia kaba shah ia ka ban poi sha ki jingpang ka dohnud khlem donkam. Ngeit ia kaba bha tam bad kyrmen ia kaba bha tam borabor. Da ka jingiashaniah iwei ia iwei ba ka jingieit ka khlaiñ.

“Ka jingieit ka iaishah jem ia kiei kiei baroh, ka ngeit ia kiei kiei baroh, ka kyrmen ia kiei kiei baroh, ka shah ia kiei kiei baroh”.
1 Kor. 13 : 7.

KA JINGDUWAI.

Ko Kpa jong ngi, ngi kwah ban iaineh ha ka jingiaieit iwei ia iwei pat borabor, kumba ngi la kular ha khmat jong Me. Ngi kwah ban lait na

ka jingtharai sniew. Iarap ia ngi, namarkata ban ngeit ia kaba bha tam wat haba ka jing-artatien kan pynshoi ia ngi ban pyrkhat ia kaba sniew. To pyndap ia ki dohnud jong ngi da ka jingsngewthuh ba ngin lah ban ithuh kloi kloi ia ka jingshisha. Iarap ia ngi ban pyniap duh ia u ksuid jong ka jingtharai sniew ka ban pynsniew ia ka jingieit jong ngi. Ngi pan ha ka kyrteng U Khrist. Amen.

Ka Jingpyrkhat Ban Sah Kynmaw.

“Ka jingtharai sniew ka long u khñiang uba dait btiar ; ka jingshaniah ka pynkha ia ka jingshaniah, bad ka jingieit ka pynsan ia ka jingieit”.

Bishop Azariah.

Ka Jingiaim Lang Ba Thymmai Jong Ngì.

Ka Janmiet Kaba Arphewar.

Kawei pat ka lad kaba lah eh ban pynsniew ia ka jingsuk jong phi ka long kaba dom bad sniew mynsiem. Haba kiei kiei hapteng jong phi kim iaid jiih, ka jingpynshoi ban bitar ka khraw eh. Hynrei ka dei eh ha kum kane ka por ba phin pyni ia ka jingsbun bad ka jingshemphang shuh shuh. Ki ktien ba la kren sbun ki long kiba jem ban kren kum ki ktien kiba khor. Pynban ka don ka jingiapher kaba khraw eh ha ki jingmih jong ki. Ki ktien kiba eh bad kiba thar ki pynmih ia ki jubab kiba eh. Katba ki ktien ba sbun pat ki pynum noh ia ki jingsngew ba sniew bad ki pyuroi ia ka jingieit jong phi.

“U soh jong U Mynsiem U long ka jingieit, ka jingkmien, ka jingsuk, ka jingshah slem, ka jingleh sbun, ka jingbha, ka jingiaineh, ka jingjemnud, ka bor halor lade ; pyrshah ia kiba kum kita ym don ka hukum”. Gal. 5 : 22-23.

KA JINGDUWAI.

Ko Kpa jong ngi, ngim ioh myntoi ei ei ruh na kaba bitar. Pynban ngi pyntlot ia ka jingieit kaba ngi don iwei ia iwei. Da ka jingbysmbun, haba donkam eh ia ka jingsbun, ngi lah ban duh

ei ia ka jingkyshow kaba khraw ba ngi don—ka jingsuk jong ngi. To hikai ia ngi, namarkata, ia kaei ban kren, mynno ban kren, bad kumno ban kren khnang ba ki ktien jong ngi kin ym pynthut ne pynsngewsih khlem ka daw kaba biang. Kyrkhu ia ngi ba ka jingsuk jong ngi kan ym long ba la pynjot pynduh da ka rukom ba ngi ia jubab iwei ia iwei. Ha ka kyrteng U Khrist. Amen.

Ka Jingpyrkhat Ban Sah Kynmaw.

“Ban kren sbun kam pynmong ia u thyllicid”.

French Proverb.

Ka Jingiaim Lang Ba Thymmai Jong Ngì.

Ka Janmìet Kaba Arphewlai.

Ka jinglehtngit ka lah ruh ban long ka jingpynwit ia ka jingshongkurim kaba suk. Namar kata ka daw phim dei ban pep ban pyrshang ban itynnad. Ym tang ba phi dei ban ibhabriew ha khmat ki briew hynrei ruh phi dei ban long kiba sá b bad itynnad haba marwei hi. Ki jaiñkup jaiñsem kiba bha kim da donkam eh na ka bynta ka jingibhabriew, hynrei ki jaiñkup jaiñsem kiba khuid ki long kiba donkam. Kumta ruh ki jingmlien kiba khuid ia ka met ki long kiba donkam. Sdang naduh ba sdang ban sumar ban ym long torti. Phin ym babe shuh ia la ka jingleh shitom haba phi iohi ia ki jingmih.

“Ka long ka jingkhmih kmang bad ka jingkyrmen jong nga, ba ha kaei kaei ruh yn ym pynlehraiñ ia nga, hynrei da ka jingshlur suda, kumba ha la ka sngi, mynta ruh yn pynkhraw ia U Khrist ha ka met jong nga, la da ka jingim lane da ka jingiap”. Phil. 1 : 20.

KA JINGDUWAI.

Ko Kpa jong ngi, ka shu long tang ka jingaidaw ban ong ba ka jingsniewbriew ka long namar ba ym don ki jingphong kiba itynnad.

Ka jingphikir ia ki jingmlien kiba bha bad ka jingkwah jong ngi hi ban long khuid ka long kata kaba ngi donkam. Ai ba ngin ym long lano lano ruh kiba lehraiñ ia la ka jong ka dur namar ka daw jong ka jingleh tngit. Nalor baroh, ai ba ka jingkhuid ba shabar jong ngi kan phalang ia ka jingkhuid ba shapoh kaba pyndon burom ia Me. To ri ia ngi kiba khuid ha ka met, ka jingmut bad ka mynsiem. Na ka bynta U Khrist. Amen.

Ka Jingpyrkhat Ban Sah Kynmaw.

Hato phim tip ba kata ka met jong phi ka long ka iingshong U Mynsiem Bakhuid, Uba hapoh jong phi, ia Uba phi la ioh na U Blei. 1 Kor. 6 : 19.

Ka Jingiaim Lang Ba Thymmai Jong Ngì.

Ka Janmiet Kaba Arphewsaw.

Phim dei ban klet ia kaba donkam ban im hapoh ka jingioh jong phi. Ka jingpynlutphut ka lah ban long ka jingbyrngem kaba jur ia ka jingshongkurim jong phi. Ki ram ki pynlong ka jingsngewsih bad ka jingbymlah shaniah. Kine pat ki long ka daw ka jingiakajia bad ka jingia-khlad. Katno kan long kaba iarap ban da ia-pyrkhat lang shaphang ki jinglut jingsep hapdeng jong phi bad ban da iakut lang thikna kumno yn pynlut ia la ka jingkamai. Ha kaba leh kumta, phin kham nang ban pynlut ia ki peisa tyngka jong phi ha ka badei. Phin da ioh myntoi shibun eh na ka. Ki jingiakajia kin ym jia. Ha kane ka kam shisha phi dei ban hikai ban iatrei lang

“Nalor kane, ka donkam ha ki sordar, ba u briew u long uba lah ban shaniah”. I Kor. 4 : 2.

KA JINGDUWAI.

Ko Kpa jong ngi, ngi tip ba ka jingshongkurim ka lah ban long kaba mynsaw lada ngi pyrkhat borabor tang ia kaba iadei bad ka tyngka peisa. Ka jingshongkurim ka kham palat shibun ban ia ka kam peisa tyngka.

Hynrei ngi tip ruh ba Me khmihlynti ia ngi ban pyndonkam bha ia kaei ba ngi don, la ka long ka tyngka peisa lane kaei kaei kawei pat. Ai ba ngin plie ia la ki jingai jingmut jong ngi iwei ia iwei pat. Nalor baroh, ai ba ngin shah ia ka jingialam jong Me ba ngin ym poi sha ka jingiamai iania. Na ka bynta U Khrist. Amen.

Ka Jingpyrkhat Ban Sah Kynmaw.

“Phim lah ban lait na ka jingshitom da kaba pynlut kham palat ban ia ka jingioh jong phi”.

Ka Jingiaim Lang Ba Thymmai Jong Ngì.

Ka Janmiet Kaba Arpnewsan.

Borabor ki don bun kiei kiei ba phi donkam, hynrei ym kot peisa ban thied. Namarkata, kaba donkam kyrkieh eh ka long ka jingthaw buit ia ka jingpynlut Hynrei la ka jingioh jong phi ka long kaba rit ne kaba khraw, shibynta na ka ka long ka jong U Blei. Kane ka bynta ba la ai sha ka balang ka dei ban long nador kiei kiei baroh ba la khmihlynti na phi. Bad dei ban ai ia ka thikna, shisien shitaiew lane shisien shibnai. Na ka kamai jong phi kane ka bynta ka dei ban wan nyngkong eh. Ia kaba sah lah ban pynlut kat kum ka jingibit jong phi.

“Ha ka sngi nyngkong ka taiew, to uwei uwei na phi un buh noh ha lade, da kaba kynshew kat kum ka jingioh jong u”. I Kor. 16 : 2.

KA JINGDUWAI.

Ko Kpa jong ngi, ngi la mlien katta katta ban pyrkhat ia la ki jingdonkam nyngkong haduh ba ngi la dei ban buh ia ki jingdonkam ka balang jong Me khatduh. Kum ka jingmih na ka jingbypyrkhat jong ngi, bad teng teng ka jingkhapnap, ka kam jong ka balang kam iaid. Mynta ba ngi iathawbuit lang shaphang kaba

ngi pynlut, ai ba ngin long kiba stad naduh ba
 sdang ban buh ia ka bynta jong Me nyngkong eh.
 Ai ba ngin ai ym tang ia ki peisa jong ngi katba
 ngi lah hynrei ruh ngin ai ia lade ha ka jingshakri
 jong Me. To ai ba baroh ba ngi ai kan long
 da kaba shitrhem bad ba sngewkmen kum haba
 ngi pdiang. Ngi pan ia kane ha ka kyrteng
 jong Me. Amen.

Ka Jingpyrkhat Ban Sah Kynmaw.

“Kaba ai da kaba sbun ka pynkhray ia ka
 bor ban ai. Ka pynheh ia ka dohnud bad ka
 mynsiem u nongai”

Bishop Azariah.

Ka Jingiaim Lang Ba Thymmai Jong Ngï.

Ka Janmiet Kaba Arphewhynriew.

Naduh kaba nyngkong thew ha ka jingia-shonglang bad jingiadei jingmut ha ka jing-shongkurim jong phi. Kane kam mut ba phim lah ban iapher jingmut. Ka kham mut wat ha ka jingiapher jingmut phin iaburom iwei ia iwei pat. Phin ñiewkor ia ka jingpyrkhat ba iwei pat i pyrkhat. Phin long borabor khia kloi ban kylla ia la kaba phi mut lada phi la shem ba kam long kaba dei. Ka jingmih kan long ba phin shem ia lade ba phi kham lah ban iadei jingmut ban ia kaba phim lah. Ka jingshongkurim ha la tei ha kum kata ka jingiadei jingmut bad mynsiem kan roi khlem pep.

“Pyndap ia ka jingkmien jong nga da kaba ialong kajuha ka jingmut, kiba don kajuha ka jing-iaieit, kiba shimynsiem hi, kiba iadei jingmut.” Phil. 2 : 2.

KA JINGDUWAI.

Ko Kpa jong ngi, ka jingbymiadei jingmut ka long kaei kaei kaba sniew tam kaba lah ban jia ha ngi. Shisha ngim lah ban khmihlynti ban iadei ha kaei kaei baroh. Me hi Mem shym la thaw ia u briew ban long kumta. Hynrei ngi tip

ba da ka jingialam jong Me ngi lah ban iakynduh bad kano kano ka jingbymiadei jingmut ha ka mynsiem khristan. To pynlong ia ngi kiba kloi ban kñia ia ka jingsarong jong ngi, ia ka jingpyrkhat la jong, ia ki jong ngi baroh, ban ioh ia ka jingialong shimynsiem. Ngi duwai ha ka kyrteng jong U Uba la lah ban pyniasuk ia ka pyrthei baroh ha Lade. Amen.

Ka Jingpyrkhat Ban Sah Kynmaw.

“Ka jingkhelaiñ jong phi baroh ka shong ha ka jingialong kawei.

“Ka jingmynsaw jong phi baroh ka shong ha ka jingiapait.”

Longfellow.

Ka Jingiaim Lang Ba Thymmai Jong Ngì.

Ka Janmiet Kaba Arphewhynñiew.

Kino kino ki jingiapher jingmut kiba lah ban iadon mynsngi ki dei ban beit noh shuwa ban thiah. Kane ka long kawei na kiei kiei kiba nyngkong ba phi dei ban mynjur ban leh. Ym don jingphoida, tang ka jingsniew ka wan na kaba pynsah ia ka jingiabitar na kawei ka sngi sha kawei pat. Mynmiet mynmiet, ha khmat jong U Blei kan long kaba bha ba phi baroh arngut phin khmih iit ia ki jingiatiplem jong phi. Na ka bynta kano kano kaba bha ba phi pdiang lane phi leh, ainguh. Na ka bynta kano kano kaba sniew, pan map. Nangta da kaba sngewskhem shisha ia ka jingieit jong U, buhti ia lade hi bad kito ba phi ieit ha ka jingsumar jong U baroh shimiet.

“To wat ai ba ka sngi kan sep noh ha ka jingkbih bitar jong phi.” Ep. 4 : 26.

“To ia phla noh paralok hi ia la ki jingpalat bad to iaduwai na ka bynta paralok hi, ba yn dup pynkhiah ia phi.” Jakob. 5 : 16.

KA JINGDUWAI.

Ko Kpa jong ngi, ki jingiabitar kin mih hapdeng jong ngi. Na kawei ka por sha kawei ka

por ngin iakhih bitar. Ngin sngewdom bad kren
 ia kiei kiei kiba sniew. Hynrei da kaba iakheif
 ha kaba kut jong ka sngi, bun shibun ki jingeh
 lah ban iapynbeit ha ka jingieit. Haba ngi la
 lait, to ai ia ngi ka jingshlur ban mynjur ia kata.
 Bad wat haba ngi dei, ai ia ngi ka jingaiei ban
 ym ban eh ia ka. Ngi buhti, ia ngi hi bad kito
 ba ngi ieit, ha Me, sa shisien pat Ha ka kyrteng
 U Khrist. Amen.

Ka Jingpyrkhat Ban Sah Kynmaw.

“Ka jingkyrpad minot uba hok ka lah
 shibun.” Jakob. 5 : 6.

Ka Jingiaim Lang Ba Thymmai Jong Ngi.

Ka Janmiet Kaba Arphewphra.

Ka jingim ba duwai jong phi ka pynriew-spah ia ka jingim jong phi baroh kawei. Ka wallam ia phi syndah sha U Blei. Na ka bynta kata ka daw hi phi dei ban ym pyndkut ki jingiamane lang jong phi. Pule bad minot ia ka Baibl ban nang ia kito kiei kiei ki ban kham pynsuk ia ka jingim. Pyndonkam ia ki bun ki kot kiba iarap ha kaba mane, ki kot kiba phi lah ban thied tang da ki khyndiat anna. Hynrei nalor baroh, ha kaba pynleit ia kawei-pa-kawei ka sngi kynmaw iwei ia iwei pat ha la ka jingduwai. To buh ia la ki jingkwah jong phi baroh ha khmat U Blei, bad Un kyrkhu ia phi.

“To phin leh kmen ha la ka sngi, duwai khlem da pud, ha kaei kaei baroh phin ai ka jingainguh : namar kane keiñ ka long ka mon U Blei ha U Khrist Jisu sha phi.” I Thes 5 ; 16-18

KA JINGDUWAI.

Ko Kpa jong ngi, ym don kawei pat ka rukom kaba kham bha ia ka jingpynkut ia ka sngi ban ia kaba duwai bad pule ia ka Ktien jong Me. Katba ngi nang shah ia Me ban rung ha ka jingim jong ngi, katta ngi nang kham

suk. Ki jingsuhsat bad jingeh ki kham sting. Bad ngi lah ban iakynduh bad ki da kaba kham shlur. Ai ha ngi ka jingtipbriew kaba bha ban seng pynskhem na ka basdang ia ka jingmlien jong ka jingiasyllok man ka sngi bad Me. Wat ai ba la ngi bun kam katno katno ngin klet ban duwai. Ngi pan ia kane ha ka kyrteng jong U, Uba ka jingim jong U ka la long ka jingduwai kaba khlem kut. Amen.

Ka Jingpyrkhat Ban Sah Kynmaw.

“Man ka por ba phi duwai, lada ka jingduwai jong phi ka long kaba shisha, kan don ka jingsngew ba thymmai bad ka jingmut ba thymmai ha ka, ka ban nang pynshlur ia phi.”

Dostoyevsky.

Ka Jingiaim Lang Ba Thymmai Jong Ngi.

Ka Janmiet Kaba Arphewkhyndai.

Ka mynsiem jong ka jingwad ia kaba thymmai ha ka jingshongkurim jong phi kam dei ban duh. Ha man ka kam, ki bnai kiba dang wan ki lah ban long kiba sngewtynnad bad ba don jingmut kumba ki la long ha u bnai ba la leit. Ki lah wat ban long kham sngewbha lada phi pyrshang ban pynlong ia ki kumta. Ym don daw ei ei balei hadien shipor ka jingshongkurim jong phi kan long kaei kaei kaba shu pynbeit bad shu mlien Ka long kaba shisha, kaei kaei kaba thymmai kan man rim. La kumta ruh, kawei-pa-kawei ka sngi ka wallam ki jingshem ba thymmai bad ki jingioh jingmut ba thymmai. Kine ki lah ban pynkhrav ia ka jingiohi jong phi. Ki lah ban pynsah thymmai ia ka jingshitthem jong phi.

“Lada uwei uwei ruh u don ha U Khrist, u long u jingthaw ba thymmai ; kiei kiei ruh kiba rim ki la duh ; hakhmih kiei kiei baroh ki la jia long kiba thymmai.” II Kor. 5 : 17.

KA JINGDUWAI.

Ko Kpa jong ngi, ha kane ka jingshem ba thymmai jong ka jingshongkurim bun na ki

jingkyrmen jong ngi la long shisha. Ngi la tip ia ka jingkmnen kaba khraw. Ngi la ioh ia ki jingiakynduh kiba kordor. Pynban tang da kaba nang ban kynrup ia ki lad kiba thymmai, ngi lah ban pyniar ia kaue ka jingsuk jong ngi kaba mynta sha ki bnai bad ki snem ki ban wan. Ai ba ngin long kiba husiar ba ngin ym duh noh ia kaba ngi la ioh. Bad ai na kawei ka sngi sha kawei pat ngin ioh ka jingpynthymmai jong ki jingmut bad ki dohnud kaba U Khrist U ai ha kito kiba wad ia ka. Ha ka kyrteng bakhuid jong U. Amen.

Ka Jingpyrkhat Ban Sah Kynmaw.

“Ym don ei ei kaba khraw ba la ju ioh khlem ka jingshitthem.”

Emerson.

Ka Jingiaim Lang Ba Thymmai Jong Ngi.

Ka Janmiet Kaba Laiphew.

Ia ka jingsuk dei ban da kamai hi. Ym don ba lah ban ai ha phi kum ka jingai sngewbha. Kam wan khlem ka jingtrei shitom jong phi hi. Lymne kam wan khlem da don bad ka jingjia kiba sngewsih. Ka long ka jingmih jong ka jingpyrshang ba iaishah jong phi ha ka jingia-sngewthuh jingmut. Ka long ka bainong jong ka jingiatrei lang bad ka jingsngewlem jong phi. Ka long usoh jong ka jingiaineh jong phi. Haba ki jingsheptieng jong phi ki jah, ka ka paw. Ki jingiakajia bad jingsniew mynsiem ki beh noh ia ka. Dei ban da kamai shitom ban ioh jingsuk. Hynrei lada ka long kaba ngi dei ban ioh ia ka, ka long keiñ kaba ngi dei ban da kamai ban ioh ia ka.

“Ngi iatip ruh ba kiei kiei baroh ki iatrei lem ia ka ban pynbha ia kita kiba ieit ia U Blei.”
Rom. 8 : 28.

KA JINGDUWAI.


Ko Kpa jong ngi, ai ba U Khrist Un iai shong da shisha ha ki dohnnd jong ngi. Ai ba kane ka jingsuk ba ngi don mynta kan ym jah noh. Khamtam pyuban ai ba kan nang phuh

sha ka jingsuk kaba kham khraw namar ka jingiasyllok jong ngi bad U. Ba la pynsuhtied ha ka jingieit jong U, ngi khmih kyrmen sha kaba lawei. Ngin ym sheptieng namar ngi ngeit Me long lem bad ngi borabor. Ai ba kan long ka jingkyrkhu, bad ka burom, bad ka jingstad, bad ka jingainguh, bad ka jingpyndonburom, bad ka bor, bad ka jinglah, ia Me, junom junom. Amen.

Ka Jingpyrkhat Ban Sah Kynmaw.

“Ka Mynta haba la im bha ka pynlong man ka Hynnin ka Jingphohsniew jong ka Jingsuk, bad man ka Lashai ka Jingiohipaw jong ka Jingkyrmen.”

Na ka Sanskrit.



Printed at Khasi Jaintia Presbyterian Press, Shillong.

24 - 2 - 59 — 3000 Bks.
